



Regd No.19134/88 <http://www.kbc.org.in> NAI/220/99
Page-4/Regd Magazine/KBCThuso/MNP-81

KBC THUSO

So479

Kum 56 Ihinna

Lhatun/April 2019

Pathen Mingailut

MAY EVENTS



Nute Nikho - 12

61 KBC Foundation Day

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11

**19 March 2019 a KBC office staff ho Gothol
Elizah Prayer Mount a anngol taona.**



**13 March 2019 a KBC office staff ho Office mun
a office mangagement Training kineina**



CONTENTS

THUMAKAI HO

1. Editorial/Pathen mingailut	1
2. Christan Chonset apohmang /Ptr, Thangneo Haokip	3
3. Huhhingna loupi / Mr Paolunlal Kipgen	5
4. Jesu Christa thile Jews te dan/Ptr. Haopu Haokip	8
5. Tho kit na thupi dan /Rev, Dr Thangboi Chongloi	10
6. Mission Column	13
6. Men Column	16
7. Women Column	21
8. Literature Column	23
10. Shalom Theological	27
11. Report	28-31

EDITORIAL BOARD

Chairman	: Rev. Tonglet Haokip, President KBC
Editor	: Dr. M. Thongkhosei Haokip, General Secretary
Joint Editor	: Rev. Henjalen Doungel
Contributing Editors	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
Cir. Manager	: Ms. Lhingjanem Haokip
Design & Layout	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.



“PATHEN MINGAILUT”

Editorial

“I-hatmo laiuvvin aphatchan michonseho khelin ana thitan ahi. Michonpha chungchangah koima pouvin ahinna toh ponte; mipha chungchanga ahinna toh ngam jong mi khattou umnante. Ahin Pathenin eingailut nau photchena eimusah un ahi; ajeh iham itile eiho chonset a ium lai tah un Christa eiho khelin athitan ahi.”(Rom.5:6-8).

Amasatah in muntina um Kuki Christian chate jouse ahideh a KBC member ho jouse chungah i Pakaiyu Jesu Christa minin salaam kahinpe cheh uve. Tulha thupi chu “Pathen mingailut” ahi toh kilhonin, i houbung leh lhangpi hinkhoa sahphat ding tampi lah a ngailutna hi poimo tah khat in kagelin ahi. Atah bah chun hiche hi vannoi mite a dinga kipana thupha lah a alenpen ahiye.

Pathen mingailut hi ngailutna dang toh akibang poi. Mihem kingailut na chun jol le gol, insung mi, ahideh a mipha mihoi chule eichunga thilpha bol ho leh ngailutna changthei mihem chu ngailutna ki-nei ahi. Amavang, Pathen mingailut chu

achombeh ahi. Ajeh chu, Pathen lekhabu chun, i-hatmo laiuvun aphatchan michonse ho khelin ana thin ahi ati.

Chule aseibena ah, michonpha chung changah koima pouvin ahinna toh ponte; mipha chungchanga ahinna toh ngam jong mi khattou umnante. Ahin Pathenin eingailut nau photchenna eimusah un ahi; ajeh iham itile eiho chonset ium lai tah un Christa eiho khelin athitan ahi. Hichehi ahi, alam danna chu! Hitobang ngailutna chu labol pa'n anajih,

*"Jesu lungsetna kidang tah (2),
Twikhanglen sanga thuh (twilen sanga thuh),
Lungset kidang keima dinga lhingset (keima dinga)*

*Kathemmona jouse sanga jaojo,
Kachonset jachatna sanga len,
O Jesu min vahchoina chu domsangun vah-choiyun".*

Hitobang ngailut sanglou ho chu milah a mivangse pen hitalou diu ham? Hijeh chun Pathen mingailutna kisan cheh u hitin, hoi lai munah um jong leu hen ijat inam mite leh adangho toh Pathenin eingailut banga eiho jong kingailu cheh dingin ikitem cheh uve. Hiti chu ahung hiteng leh iPakaiyin ei ngailut nau chu aneo pena eiho hinkhoa ibulhin sah diu ahin, Pathen lunglam bol ihidiu ahiye. Lungluttah a simjouse chung a Pathen vangboh changjing taken.

CHRISTA'N

Vannoi Chonset apohmang

1 Peter 2: 25

Pastor Thangneo Haokip
Centre Church N.G.V.

SERMON

Introduction: Good Friday hi vannoi a atahsan chate jousen Christa'n Cross chung a gim gentheina sangpen athoh a vannoi chonset jouse apohmanga, a lei-set hinkho geijeng jong anapeh doh nikho "Good Friday" tia ihet jingu ahie. Ahin ipi jeh a Christa thini chu "Good" (apha) kiti hintem? Tahsan dolin Christa athi chu apha ahipon, hinla athi jala eiho chonset ngaidam ichan theinao chu "Apha" tia anikho chu kihe ahi tihi eiho tahsan ahi.

Hiche Bible chaang (1 Peter 2: 25) hi keidia Christa'n ei ngaidamna kaki hetchenna ahi. Hiche hin ka hinkho eikhel ahi.

Malai Chonset Kithoidam dan: Malai Mose khanglai chun kel ngoinou leh vakhu mangchan chonset ana kithoidam jiuve. Hebrew bung 10 sunga kho isim leh danthu (law/commandment) achamkim lou thu akichen in ahi; sei dingin, koitobang khat in dan thu apalkeh leh amachu chonse a hitai. Amachu ngaidam achan theina dia gan thisan asoding chuleh Thempu pan pumgo thil to abolpeh ding ahi. Hinla hiche danthu hi vannoi mihemte koima chan ajujou poi. Tulai paova sei dingin pastor, evangelist ahilou

leh Pathen lhacha ho jengin jong danthu hi aki juijoupon ahi. Hiche phat ache dungjuiya ahimona ding tampi ana umtan, tekahnan, mihem hijatpi hin chonset akithoidamna din kelngoinou hoilai a alah diu hitam? Avel vel a chonset kithoidamna dia gan a kilhai boljing ding chun economy nasatah a asuhkhah ding ahi. Tulai khang a hin mi khat in chonset abolchan a Christa hung thi ding hileh, vannoi mihem hi jat hin chonset abolseh in Christa chu avel avel in hung thi hita leh ijat vei athi ta dem? Hichu Christa Ama jengtah in jong ajolou ding ahi. Hijeh a hi Hebrew Lekhatot sunpan (St. Paul) ase chu ahileh gan thisna in imacha acham

kimsah jou tapoi, chuleh Pathen alunglhai sah jou tapoi.'

Hiti ahitah leh Pathen lunglhai-na ding ipi hitan tem? Mihemte sumle pai, chuleh tha leh jung jong tongkha lou ding; avel vel a chonset kithoi damna jong ngailou ding- khatvei kithoidam chu atonsot a hiding?

Christa'n chonset atonsot a dia apohmang:

Peter lekhatot isimleh Christa Cross chung a athi aloupi dan leh amantam dan akimudoh in ahi. Peter in aseina ahin Jesu Christa'n vannoi chonset jouse atahsan chung a hi apohmang ahitai. Hebrew 10: 10 kho ivet leh 'Jesu Christa khatvei seh bou athin ahi. Hinla khatvei seh athipa hin vannoi chonset a imatih chana dinga asuh theng ahitai. Mihemte hin idamsung sea hi chonset kibol ding ahi.(Hinla chonset bolthei ahi tia phalna kipe ahipoi.) Chonset umlouna /chamkimna mun chu Vangam tailou mundang umlou ahi. Hijeh a hi Pathen in mihemte dinga thuhtah a angaito a, Achapa Jesu Christa leiset a ahinsol lhah a, thohgim gen-thei hesohna sang pen, vannoi mihem ten athoh dia hithei lou athoh a vannoi chon set pumpi (nam khat leh phung khat mai mai a dia hilou) a imatih channa dia apohmang ahitai. Hi jeh hin eihohi ivangphao vin ahi ajehchu

koi hijongleh achonsetna kishih a atahsan te dia vangam lut hi hah sa louhel a lampi um ahitai.

Conclusion:

Keima hinkho a akidang pentah chu Jesu Christa'n ka chonset jouse ei pohmang peh tai ti kaki hetdoh nikho chu ahi. Hichun ka hinkho eikhel tan ahi; ka lung-gimna leh kichatna jouse ana pomang sohtai.

Pathen in hichan geija hi vannoi ei ngailut u ahi. Hiche Pathen mi ngailutna kihetmosah ahilouleh nahsah lou ho din iti ngaidamna umthei ding ham? Good Friday nia Christa- themmona neiloupa, Achungthu kiseiya, kisugimma, a eng-eng a kibolpa, nahsahmoa koite'n tonsot gotmun alodiu bou ahitai. Ahileh Tahsan chate dia anom ipi hintem? Eiman chamkimna kinei hih beh jong leh Pathenin achamkim a eisim; ki chonpha hih jongleh achonpha a eisim ahitai. Hichu Pathen phat jal ahin, eihoa kipat ahipoi. Sopite, kumseh in Good Friday imanguvin, ahin ichonset nao Christa to ithikhomsah u hinam? Christa'n vannoi chonset apohmang kiti hi thil kidangtah ahin, hichu Pathen thilbol ahi; hinla atahsan loute dia thina ahi.

Tukum Good Friday leh Easter Sunday Pathen to mangkhom tei din chuleh chonset dalha din ikitem uve.

Huhhingna Loupi

Mr. Paolunlal Kipgen, M.Th.
Director Children Ministry, KBC

Sermon

"Huhhingna loupi hi nahsahmo leohen eiho iti isochat dinga ham"
Hebrews 2:3b

Jesu Christa chung chang thu hi vannoiia dia aki hekkel pen tah le mijouse kinelna ahi kitile seikhel ahi lou ding katah sanne. Ahung pen dan jong kidang, athi dan jong kidang, chule athodoh danjong kidang tahbeh ahi. A Pathen hina le a mihem hina jong akidangin aching le athem ho jouse jong kinel na ahung hitan Pathen ahi nale Mihem ahina seilepma tahsan lou jong mi tampi aum da pon ahi. A ipi chu hitajong le vannoi chonset huhhing aum thei nadingin Jesu Christa mihem ahinale a Pathen hina ani gel'in apoimo cheh in ahi. Theological terms a seidin "Hypostatic Union of Christ" kiti hi Jesu Christa hinkho a mudoh thei ahi. Mi bang khatnin Jesu Christa chun iti dana hitobang hina (nature) ni hi anei kop thei ding ham? Cross a athi jouva pat a mihem hina chu mang hitam? Pathen hina nei mi chun iti dan'a thina chan ato thei ham tia lungdong tah a gel a tahsan lel jong aum da pon ahi. Het dinga poimo tah khat chu ipi ham itile vannoi chonset lhatdoh le huh doh a aum thei nadia Jesu Christa chun Pathen hinale Mihem hina anigel'a apoimo in ahi. Ajeh chu Pathen ahi na achu pathen thalheng ahin mihem ahina achu Mihem thalheng ahin, mihem ahi jeh a thina chan ato ahin, Pathen ahi jeh a thina in hen jou louva thina akon thoudoh kit ahi ti hi suhmil lou hel ding ahi.

Miching le mithem hon Jesu Christa thi chung changa aheth khel ule adih lou nao phabep veo hite.

Ransom to Satan Theory: Hiche theory hi abai pen'a sei dingin Jesu Christa thi hin Satan man (price) apeh ahi. Hiche theory hi A.D. 185–254 vella Origen kiti pan nasa tah a ana hil le ana tahssan chu ahin ahi. Origen kitipa hi houbung Upa masa ho lah a khat ahin, Pathen thu hetna lam'a jong hetgilna neimi ahin hijongleh Jesu Christa ahung thi hilchet nale atahsan vang hi adih louna tampi aum in ahi. Hiche thuhil in asei

pipen chu vannoi mite chonset hi Satan natoh na akon ahin, hijeh a chu Jesu Christa ahung thi chun chonset man jouse chu Satan apeh ahi tai. Ahinlah Pathen thuthengin eihil uchu ipi ham iti le satan akon chonset hung kipan hijongle hiche chonset ngaidam na chu Pathen akon a bou umthei ahi jeh in chonset man chu Pathen kipe ahin, chonset man (ransom) Satan kipe hin Pathen sanga Satan achungnung sah joh ahi jeh in hiche thuhil hi adih lou ahi. Cross chun Satan thu atan ahin, Satan man kipeh nading lampi ima aum poi.

Recapitulation Theory: Hiche thuhil hi Irenaeus in A.D. 130–200 vella nasa tah a ana hi lhang le ahin athuhil pipen chu ipi ham itile Jesu Christa chun Adam hinkho tobang chetna hinkho ahin manna chonset jeng jong ahin to khah jeh a thina chan achunga lhung ahin hijeh a chu Adam thakhel a pang thei ahi ti hi ana hill hang le chu ahi. Hiche thuhil hi adih najong aum dapon ahi. Ajeh chu 1 Cor. 15:45 a kisei bangin Jesu Christa chu Adam nunung ahi dan jong akiseije. Hijongleh Adam hinkhoa chonset ana um vangin Jesu Christa chu chonsetna neokhat jong neilou hel ahi. Hiche thuhil hin Jesu Christa Chonset lhatdoh na sangin ahinkho Mandan Adam a toh tekah na aha peh jeh in adih louna aum in chule Jesu Christa chonset lhatdoh na dia ahin na apeh hi aha gel thupi poi.

Moral Influence Theory: Hiche thuhil hi Abelard kiti pan A.D. 1079–1142 vella chu nasa tah a ana tahsan le ana hill hang le chu ahin ahi. Hiche thuhil hin ahil chu ipi ham? ipile Jesu Christa thi hin chonset man apei tina aum deh pon ahi. Amavang Jesu Christa hung thi hin Pathenin chonse ho angailut avetsah a, lungheina anei diu hi aki hil thupipen ahi. Hiche thuhil adihna tampi umjongle adih louna jong aumkit thouvin ahi. Pathenin eingailut jeh uva achapa changkhat she chu chonse ho lhatdoh dia apeh doh ahinai, hijongle Jesu Christan man apeh hi Pathen lunglhai na ahin, chonset man kipeh na chungga Pathen lunglhaina ahi agel khoh lou u hi adih louna ahi.

Accident Theory: Albert Schweitzer in 1875–1965, vella ana thuhil chu ipi ham itile Jesu Christa thile chonset lhah doh nahi akimat na ima cha aumpon ahi. Jesu Christa chu Messiah dan'a Pathen Lenggam thu ahung seiphong le ahin hinlah akimlah donna kichai doh dannin aseijin ahi. Jesu Christa hungthi chu imacha apha-tchomna umlou danin ana hillin ahi. Amavang Pathen lekhabu in Jesu Christa hung thi hi Pathen thilgon ahi dan le chonset lhatdoh na dia hung thi ahi dan kichen tah in eisei peh uvin ahi (Matt. 16:21; 17:22; 20:17–19; 26:1–5; Isa. 53:4–6).

Example (Martyr) Theory: six-

teenth century vel chun Socinus kitipan Jesu Christa thile chonset lhatdoh akimatna imacha aum loudan ana hil lhang len ahi. Jesu Christa hinkho Mandan hi atahsan lou hon vetton na nei ding ahi dan jong ana hillin ahi. Jesu Christan thichan geija thu ngai na anei hi eihon jong thu ngai na dia kihil na mai maija neiding ti ahi. Hinlah Jesu Christa hinkho man hi atahsan lou ho vetton ding hilouvin, atahsan hon vet ton na neija juinding ahi dan Pathen lekhabu Thengin eihil uve (1st Peter 2:21)).

Chunga point 5 kipe hohi adih tobangin akilang umjongleh adih lou nao aum cheh in, hijeh chun Jesu Christa thi chung changa Pathen lekhabun eihil uchu ipiham veo hite.

Thakhel/Thalheng (Substitution): Jesu Christa Pathen Chapa hung thihi eiho thakhel le thalhenga hung thi ahi (2nd Cor. 5:21; 1 Pet. 2:24); (Heb. 9:28; Isa. 53:4–6. Greek preposition anti le huper kiman dan chu thakhel /thalheng (in place of/in behalf of) tina ahin hiche grammer akon mudoh thei chu ipi ham itile Jesu Christa hung thi chu eiho thiding khel le thalhenga hung thi ahi dan kicheh tah a mudoh thei ahi.

Lhatdohna (Redemption): Lhatdoh na kiti hi thucheng Greek pao “agorazo”(to purchase in the market) bazar akon kichodoh tina ahin hiche hin avet sah chu ipi ham itile Jesu Christa chun man

eipeh uva eichohdoh u vetsahna ahi (1 Cor. 6:20; 7:23; Rev. 5:9; 14:3, 4). Chonset soh a ium naova kona Jesu Christa chun eichoh doh u ahitah jeh a eiho ama a ihiu ahitai.

Pathen toh kichamna (Reconciliation): Greek thucheng katalasso, kiti hi kikhel/kicham (to effect a change, to reconcile.) tina ahin hiche hin avetsah chu ipi ham itile Jesu Christa thi hin Pathen to kivop thei loule kiloi khom thei lou jong chu tahsan jalla kicham nale kiloikhom na asem doh ahi tai.

Pathen Lunglhaina (Propitiation): Pathen hi atheng chule chonset na nei lou ahi jeh in Jesu Christa chonset na neilou thisan chu Pathen lung lhai ahi (Hebrews 2:17). Pathen lunghan najouse chu Jesu Christa thisan jalla lunglhai nale ngaidam na aum kicheh tah a mudoh thei ahi (to appease or satisfy the wrath of God).

Them channa (Justification): Jesu Christa hung thi chun atahsan jouse pathen anga them channa anei ahi tai. Hiche thilpeh hi Pathen ngailut na akon ahin, mikhat chun achonsetna akihetna Jesu Christa tahsanna anei teng Pathen anga them chang ji ahi tai.

Pathen ang a thiem chan nale Pathen to kiloikhom na hong sunga ilut thei nao hi Jesu Christa thisan jalla kon ahi jeh in huhhing na kiti hi Jesu Christa tilou adanga aum poi. Asim jouse pathenin phatthei boh taken.

JESU CHRISTA THI LE JEW'S TE DAAN (LAW) UM DAN

Gospel John 15:13

*Pastor Haopu
Principal, Dr Colvin academy Moreh.*

Sermon

"Min ajol agol ding a ahinna apeh sang a NGAILUT NA Chungnungjo koiman aneipoi,"

Masang laiija a Hebrew te chu thutan naleh kivaihom na lam a thudih tah vaihom themtah ahivin,etidan a chu Jesu Christa them mo na neilou ,chonsetna neilou pa chu, chonsetna nanei tha a atha ahidem.?..epijeh ahi dem.? Ajeh dang tampi aum poi, Bible in jong ajeh dang aseipoi, NANG LE KEI chongset jeh a Christan ahinkho anapeh ahi,hichu John Gospel in a amu Chen ahi.hichesang a NGAILUT NA Chungnungjo koiman anei lou, dan ana phondoh ahi.hitobang ngailut na hi um jong umkit talou ding ahi,

JESU CHRISTA CHUNG THU KITAN .

1, Hebrew chondan dih ta chu Monaneimi chonset khat jong ahin thei na ding lampi tampi kikomu pih je ahi,

2, Monaneija Dan dih louva Chonho jong jamthip a gakimen ngai Lou ah.

3,Chonset na mi jong chu ama (ukil) judge um louva koiman thu adoh ngai Lou ahi.

4,Monaneija Dan dih louva Chonkhat jong chu ukil judge um louva public in thudoh le totna a anei ngai Lou ahi.

5,Thudih um doh theina dia Mipiaang a kidin sah a public voice kingai Ihaje ahi.

6, Themmo kichensa michonse khat jong chu,phat kiteppih maset a,chuteng athemmo dung jui a

punishment kibol je ahi,

7,Sabbath masang nikho kigin nia koimacha cross a kikhetbeh ngailou ahi, ajeh Sabbath kisuboh ngailou ahi.

8,Sanhedren upa 70 ho lah mikhat tou, in NGAILUT NA thucheng aseikhah le Themmo kichensa jong kihuh doh kit thei ahi.

8, Chule Jew Dan hi nin akikhen in, hichu houthu le tahsakivai homna thu ahi. koitobang Dan khat in themmo chenta jong, khat athen a le kihuh hing thei ahi.

9,Themmo kichensa michonse khat chu thutan na ang adin ding le amen hon ajih Ihingset apih dia chuban a athemmo Chen nao ho apoh doh dia ahi.

10, Lengpa thupih bolsa chu

koiman apelkeh ngai lou, Dan in themmo achensa jong lengpan ahuh hinng thei ahi.

Chung a esei Dan hohi Jews te ding a thupi mama jeng ahi, Jesu Christa them mo kichen dan hi evet le Themmo na nei lou ahi Dan aki cheh in ahi.

Gospel John in amu Chen dan evet le Christa Jesu hi ama chonset jeh a Themmo kichen hilouvin, Michonse nang le keijih a Themmo nanei lou Themmo kichen a cross a akikhen beh ahiti, amuchen in ahi.

THEMMO NA NEI LOU CHRISTA THEMMO KICHAN.

Jesu Christa CHUNG THU KITAN hi evet le Jew's te Dan toh kitoh lou tampi mu doh thei in aum in ahi, Jews te hin Christa Jesu hi vannoi huhhingpu ahi dan hi anamu Chen theipovin ahi, tunichen in amu Chen theipovin, hiche hin Vannoi huhhingpu Christa Jesu ahina asel mang theina dia Satan tohgon ahi aphochen in ahi.

Dan toh kitoh Lou Christa kibol na,

a) Christa huhhing sang a Themmo na nei Barnabas huhhing nom na lungthim neitao.

b) Jan met lou ding in Dan um jong le Jesu Jan a mantaove.

c) Jesu Chung a public in thudoh tampi nei. Hichu Jews Dan in phel lou.

d) Jesu Khel a achung seipih ding ukil judge koi pih ding sanhindren upa 70 nom ta lou.

e) Mipi maija phot Chen na ema kibol sah lou.

f) JESU kihuh hing thei na dia phat kipeta lou.

g) Sabbath ding kon cha Themmo kichen a cross a kikhebet ta.

h) Thutan na mun a kidin sah khah him him lou chusang a pilate hoheng a kipui le le..

I) DANTHKhel a Thempu ho kimang a Themmo na nei lou, themmo a kisim.

j) Anna's Thempu pa masang a thu doh tampi kinei, adonbut lou jeh a athemmo a kila. adonbut kit jong le Thempu noise a kila ding ahi aheth jeh Jesu thipchet umta.

Pathen mi ngailut na ahi mihem lunggel a geljou lou, sim a simjou lou, hitobang ngailut na hitam so-pite ho ngaito pha lea hen,

Judas Iscariot hin Themmo nanei lou thisen kapih doh jih in kathemmo tai, ati. Judas Ngailutna achang in athusim hi tuni Chen akiseije, ahin Christa mingaidam na vang achangjou tapoi, achonsetna le alhepche athipi tan ahi.

Tunin phat tah in gel uwhite Christa mingaidam na changjou Christians ahicheh ou ehin hinam. Good Friday service vel ejat ahin mu hitam. koi ham nang Khel a cross hungthi chu. hichesang a ngailut Chungnungjo koiman anei poi.

Asimjouse pathen in vang boh na pejing taken...

THOKITNA THUPIDAN



(I Cor. 15:12-19)

*Rev. Dr. Paotinthang Chongloi
Pastor, KBC Centre Church, Tuibong*

Sermon

Thumakai:

Good Friday le Easter Sunday hi Jesu Christa eiho lhatdoh dinga athina le Thina gal ajona nikho loup cheh ahi. Good Friday le Easter Sunday hi kikhentheilou, khat athupi joi tiding umlou Christian thuhi laigil cheh ahi. Jesu Christa thina-a konna athodoh hi Pathen thahat kiphondohna ahin, mihem a dinga dinmun thah ineinao ahi, ajeh chu Jesu thina-a konna athodohjeh a mijouse dinga thokitna umding ahi ti thuhil kichehtah imuvn ahi.

Jesu Christa thina-a konna athodoh/Thokitna (Resurrection) hi Christian Theology a dinga central theme khat ahin, subject lentah jong ahi. Hiche sermon a hi I Cor. 15:12-19 sunga konna chomcha-a inagel khomdiuva anojia point 3 in kahintah lange:

1. THINA A KONNA THOKITNA (v. 12)

Korianth khopi a mi kimkhat in thokitna aumpoi tia thuhil ananeiyu ahi. Hiche thuhil chun mikhat chu athi le achaina ahi tia anahil'u ahi.

Hiche athuhil'u hi Solchah Paul in Jesu Christa thina-a konna athodoh kit kichentah-a ahettah lhonin thokitna hi aum monge, ajeh chu Jesu Christa thina-a konna kaithouva aumhi amaho athuhil toh kikal ahin, thokina chu umlou hileh Jesu Christa amatah jong thoudoh lou ding ahi. Thokitna thudol hi Thulhun Lui a jong akimu jeng vangin mi phabep hin ana tahsanlou ahi (Job. 19:26; Psalms 17:15...). Sadukai hohin thokitna aumpoi atiu ahi. Hiche thuhil hin Korinth khopi-a Jewish mi phabep hin atahsan ahi.

II. THOKITNA UMLOU HILEH MIHEM TEHI ITOBANG DINMUN INEIDIU VEM? (I Cor. 15:13-18)

Solchah Paul in Korinth mi kimkhat thuhil donbutna aneina a konna kimu chu Thokitna hi umlou hileh:

1. Christa jong kaithoulou hiding leahi.
2. Athuhil lhanglejong moh hiding,
3. Thuhil tahsanho jong moh hiding,
4. Jouthu hettosah a kilangdiu,
5. Chonsetna umjing nailai ihidiu,
6. Christa a ihmumil teho chu amangthah gam ding ahitauve, Thokitna hi umlou hileh achunga kiseiho chenghi kichat tijat umtah dinmunna idindiu hi kichentah in akimun ahi. Solchah Paul in Korinth mite kom-a asej jousehi eiho dinmun jong hiding ahin, tu-

nia ikiloikhomnao hihen, Pathen thu ilhangsap'u chule ikinepnao jousehi moh hiding, mi jouse laha avangsepen ihidiu ahi.

III. THOKITNA LEH KINEPNA (v. 19)
Solchah Paul in thokitna hi umlou hileh tu hinlai sung ding jenga Christa chu kinepna ineiyu ahile, mi jouse sanga khoto umpentah ihidingu ahi ati. Mijouse sanga khoto umpentah atilona hi hiche phatlaiya hi mi khat chu Christian ahung hileh achunguva hi insunga kon hihen society a kon hijongeh suhgentheina jatchom chom hung chujia an neh tuidon, sumle pai dinmun hijongleh gentheita-ha hinkho anamanjiu ahi.

Christian khat hijeh-a leiset nopna tapi anungsun jou nunga itahsan, ithusan chule ikinepna moh ahiding chu Paul in atahsanlouho leiset haosatna pum-a nomtah-a hinkho mangho toh atekah leh khoto umpentah ihidiu dan asej ahi. Thokitna hi ana umlou hileh tunia hi Huhhingpu ineilou diu, ngaidamna umlouding, Kipana thupha kiti umlou ding, tahsan le kinepna kitiho hi umlou ding ahi.

Jesu Christa thina-a konna athodoh hin kinepna eipeuvin chule Ama athodoh vanga Ama tahsan jouse jong kaithouva iumdiu kinepna eipeuve.

Jesu Christan, "Keima hi thokitna le hinna kahi; keima eitahsan a chu thi jong le hingding ahi"

(John 11:25). Ipu Paul tahsa thodoh kit thudol aseina a hitin ana-seije "Ahinla i-Pakaiyu Jesu vanga jona eipeuva Pathen chu vahchoiyin umhen" (I Cor. 15:57). Lhagao hinkho-a kinepna ineitheinao abul chu Jesu Christa lhanna konna athodoh hi ahi. Hiche hi Christian te dettah a ikingapnao foundation dettah chu ahi. Hiche thuhil hi adihlou ahile Paul in aseibanga mi jouse lah-a khoto umpen ihidiu ahi.

Thuchaina:

Jesu Christa lhanna konna athodoh ahilouleh Thokitna (Resurrection) hi Christian te tahsan kibulphuna le ikinepnao thuhil thupi pen ahi. Hiche thuhil hi adihlouleh Christian pumpi ilhuhtheinao thuhil ahibanga Paul in Jesus Christa thina-a konna kaithouva aumtah jeh in Christian te dinga ikingapnao thuhil thupipen ahi tihi imuvin Pathen chu thangvah in umtachen. Thokitna hin Jesu Christa tahsan jouse eiho jong kaithouva iumdiu kinepna eipehkeo-u hilouvin hinlai damsunga jong thokitna hin galjona, kinepna, thahat eipeh'u ahi. Hijeh a chu Solchah Paul in Jesu Christa athokitna le athilbol theina thahat chu ahethnomna le athohgimna ho akikoppi nom thu Philippi mite anathot in ahi (Phil. 3:10). Jesu Christa thodoh kitvanga nang le keiyin thina gal ijotheina thahat ineikeo-u hilouva Christian hinkho ahilouleh lhagao gal isatnao-a thahat ineitheinao chu thokitna thaneina chu Jesu Christa toh kikop ihijallu ahi. Pathen in phatthei eibohcheh taohen. Amen.

KBC AMBULANCE THUA HETSAH LE TIEMNA

Muntin a Houbung mithengte henga hetsah nom chu Pathen lungset in 2018 in Ambulance ina kichoh doh taovin, tuni chanin ijochan uvin Hospital mun a kijendam joutalou a vangsetna toh a kithopi ngaicha ho akisol peh jingin ahi. Hinlah Houbung mite hon ina hetthem diuva hung kidei chu Ambulance hi dammo veiset na jeh a ngaicha jouse hi hung kilunglhai joujilou ahijeh in ana hethem cheh dingin tiem na ahung kineije.

By: General Secretary,

Mission Column

Mission Conference 2019 munding

Achesa 3rd March 2019 nichun Convention Mission Board Centre Church Kangpokpi a anakichen Gambih lamkai chule houbung Deacon Board chengto Mission Conference munthua kihoulimna le chadon khom na anakinei in ahi. Kipa umtah in Gambih Pastor le Centre Church Pastor chule gambih lamkai hon hiche Conference hi Convention Assembly in host boldia adeisah na kipah tah in ana sang un ahi. Amun ding hi akiven ahileh Church Compound sung hi neo akisan hijeh chun Kangui Christian College compound sunga hi akidei sah in amun vetlhah na jong akinei khom in ahi. Hito kilhon chun College lama mopo hoto kihoumat ding in pha akisan ahi.

Anikho le aphot ding chule hiche Conference sunga mopoding committee member ho gambih le houbung in ahin kilhen uva chule office lama kona mopoh na lading ho jong Mission boardin agangthei pena ahinlhen doh a 30th March nileh program semto goma tohgon ho suhtup din pha akisan ahi.

Mission Week/Sunday kiman na chung a kipa thuphon.

Kumseha hung kimang jing bangin tukum in jong Mission Week/Sunday kipah tah le thanom tah in KBC houbung jousen anakimang kit in ahi. Centre Church atamjo pastor kichotkhel na akinei jin chule gambih pastor ho jong ama ama chenading akigon peh in chubanin Mission board member ho jong houbung vilna a pan akilan Mission lamto kisai jin houlimna anakinei jin ahi.

Muntina akinganse nabanga kipah tah a Mission Sunday manga Pathen thusei dia kalsong ho chung a kipa thu akiseijin chule houbung hitabang mission program kipah tah a gonga ahung kalsong ho kipah tah a kikhop pi ho chung a kipa thu akisei jin ahi. Pathen in mabana Convention Mission puijing henlang alengam kehlendin lolhin na pejing taken.

Houbung mipi te henga temna

Muntina KBC houbung mithengte jouse amasan kajanale kangailut nao salam kahin boll uve.

Tunia nakom uva kahin hetsah nom chu Mission Sunday inaman chai tah uto lhonin houbung ijat hamkhat in Mission Envelope chu ahin thalut tan, hinlah houbung atamjo hin ahin thah lut hih lai jin ahi. Hiche Envelope hi Mission budget kithopi phapen khat Pathen na itoh nao va machal na lenpen khat chu ahi. Hijeh chun geldao lou hell-in houbung Mission lamkai hon eimaho houbung cheh a envelope anakihom doh hochu agangthei pena office lama ihin thah lut cheh diuvin temna le hetsah na kahin neije.

Mission natoh tunichan in boina umlou vin ichelha jing naove. Ma-bana jong houbung jousen Mission share ipoh u olle kumlhun lamleh tilou vin ahitheh leh alha lhaa pehthei dia igonu share chu regular tah a office lama ihung thah ji jidiuvin Pakai minin temna kahin neikit e. Convention Mission natioh kiti hi eiho houbung panlah jalla kitong ho bouchu kiseina ahi. Office in ama chama phante tia agonle atoh aumchom poi, hijeh chun budget tohgon kinei ho tongdoh joulou va ium lou na dingun kiha bolu hitin, ponpan tah in imu kham khamu aphot chan Mission office lama hung thah lut jiu hite tia pakai mina temna kahin nei ahi.

Suhdihna:

Achesa KBC Thuso March issue achun Mission column a 2019 Mission budget tahlang na ahung kinei jin ahileh 2018 kuma pa anakitat lut khatai. Gambih houbung share hohi houbung khat le nitilou vin alhangpia seidin akikhel lou tabang ahin hinlah Centre Church a vang hi hatah a kikhel ahi. Hijeh chun bolkel na chungga ngaidam ahung kithum in anoiya hung kipe adihpa hi inache pi joh diuvin Pakai minin temna le hetsah na kahin neije.

KBC CENTRE CHURCHES MISSION BUDGET TARGET 2019

Sl.	HOUBUNG MIN	TARGET AMT.	MAINT.	REMITTANCE
1	New Lambulane	16,50,000	4,95,000	70% of total income
2	Langol	14,50,000	4,35,000	
3	B. Vengnom	12,00,000	3,60,000	
4	Kangpokpi	10,00,000	2,88,000	
5	Salem-Vill-S Meina	9,60,000	3,00,000	

6	Molnoi Area	7,00,000	2,10,000
7	Tuibong	6,00,000	1,80,000
8	NGV	3,50,000	1,05,000
9	Canan Veng (I)	3,30,000	99,000
10	Haokip Veng	2,70,000	81,000
11	Tujang vaichong	2,00,000	60,000
12	Thingjabong	1,75,000	52,500
13	S.Kanan Veng	1,50,000	45,000
14	Chassad	1,50,000	45,000
15	Chavangphai	1,50,000	45,000
16	Lamphel	1,35,000	40,500
17	Salem Saikul	1,10,000	33,000
18	Hill Town	1,05,000	31,500
19	Sangaikot	65,000	19,500
20	Singat	50,000	15,000
21	Leimakhong	50,000	15,000
Grand Total		98,50,000	29,55,000

Rupees (Ninety eight lacs fifty thousand) only

NEPALI FIELD A MACHALNA



Mr. KAMAL RAHUDTH family (mi5) hi dt 19/02/2019 Saikul gambih no 3 Ekou Bazar opposite na kon ahin, hicheni hin lahlut na akineitai. Maban hinkho a baptize bol theinadin itaonao cheh in kop jingu te

Ms. Anjali Tamang hi Bhudhist background na konna ahin, dt17 /03/2019 nihin lah lutna akineitai KBC Gambih no. 6 "ho ahi



TAONA MOUL CARETAKER KIKHELTA

Muntina Kuki Baptist Convention houbung mipi te henga hetsah nom chu Gothol Taona Moul (Elijah Prayer Mount) a Evan. Paolam Kipgen care taker a anakipan sah chu tua patna amahi General Evangelist joh a kimang ding ahitai. Ama khela Mr Jillun Haokip hi Taona Moul Caretaker a kipan sah ahitah jehin taona mangdia chenom jousen anoiya kipe Phone no a hi contect nabol masat uva nache ji diuvin Mission office lama kon hetsah na ahung kinei jin ahi.

MR JILLUN HAOKIP Phone no 7629978062

Men Column

MEN DEPARTMENT in agon Lom Resource Centre mun a Tui kilalutta.

LRC mun na tui ngaichat ahijeh in, lungdong tah a lah lutding dan akingai to laijin pathen na ding nga chimlou va anei agou phal mipa khat nin pipe achang ding kham eichoh pehkeh uvin, tuhin LRC mun na tui akila lutthei tan ahi. Pathen nin ama leh a Insung mite phat thei boh jing taken. Tuhin tanky khat amun nin akisem lai tah ahi e, chule amun (agamsung) jong hatah a jochan na akivat theng lai tah ahi.

Natoh na hi alhang pi in pu Thangtinhen Doungei hapan najalin aban chan akitong thei jin, ama chung nga jong kipa thu seijou lou akiphong nge.

Tohkhompi Rev D. Singson leh Rev. Seilen Haolai Pension cheta.



Rev Doujathang Singson (D. Singson) hi Pu Jamkhohen Singson chapa athum chana ahin Keithelmanbi Military colony Manipur a anapengin Saijang kho Nagaland a ahung seilen e.

1994 kumin KBC Mission worker khat in ahin tongpan in Kum 2008 in Rev Ordained anachangin chujouva patchun Nepal gama KBC Mission field supervisor mopohna apo in ahi.

Ama mopoh na noijin Nepal gama houbung nga akitung doh in hiho chu 1. Danabari Baptist Church 2. Paijan Baptist Church 3. Borong Baptist Church 4. Rake Khari Baptist Church 5. Chupti Khula Baptist Church ahiuve.

Kum 25 tabang Kuki Baptist Convention Mission noiya Pathen na ahin tong in ahi.

Rev. Seilen Haolai apa (L) Nguljaseh Haolai hi Tujang vaichong KBC No 6 a kon ahin, 1st March 1997 hin KBC a worker khat in appointment anakibol in ahi. ama hi March 2 2005 KBC Penteniel Fellowship kiman na Imphal mun ah Ordination ana chang in ahi.

Aman atoh sung a ana pohna ho chu KBC No 3, Cashier, Evangelist, Gambih No. 14, Gambih No 5, Gambih 11, Gambih 7 chuleh Centre Church Haokip veng ana po in atohna mun ho a tomngaitah in ahin po in ahi.

Amani hin nisim 1st March 2019 nikhoa amani kum 60 ahung Ihin tah jeh Ihonin KBC Pension Board in mellom tah le jana neitah in vailhah na Head Office muna ana neipi taovin ahi. Pathen in mailama ahinkho puijing taken.

KUKI NATIONAL DAY OF PRAYER

(K U K I N A M P I T A O N I K H O)

The 28th April 2019

Kumseh a Lhatun Pathenni nukhah pen (Last Sunday of April) hi nampi taona nikho a inaman jing u ahito lhonin tukum jong KCLF in hiche taona nikho a itaona diuvin anoiya bang hin ahung kigong kit in eima khosung leh houbung sung kilemdan dungjuiya aphahei penna ina kigon uva inam pumpiuva dia ina taokit diuvin tepna ahung kineiyn chuleh tukum itaonau va ithupi diuvin, "neihin kouvin keiman nadonbut ingting nanging nahet khah louhel thil kiselguh naseipeh inge" Jeremiah 33:3 hi ahung kigong in ahi.

Hiche to lhonin hiche taonikho le hin achesa Lhatun nisim 28-30. Pakai kum 2000nia Sapormeina vangkhua a inam sunguva lamkai milun ja umtah hon nampi minna kitepna 'Thuphon Som'(Ten points of Covenants) ana neihou jong avel a isimdoh kituva hicheho hejing puma inatao diuvin ikitem kit un ahi. Hiche to kilhon in kumseh a ina bolngai jing bang uva hiche nile hin neitokhom jong iboluva, eima eima Houbung Head Office ina pehlut uva hichu KCLF finance langa mopohon ana lahdiu ahi tijong avelin hetsahna kahin neikit lhonne.

TEN POINTS OF COVENANTS:

KITEPNA NO. 1 - Van le Leisiet sem Pathen chu ka nampi Pakai ahi chuleh ka nampi chena lhongpi chu Khrista kipana Thupha to kitoh hiding ahi. Hiche na ding chun April 30 nihi ka nampi taona Nikho a mandin kadei uve (Hiche hi mijouse dia kilem jodinga akigel jeh in April lha Pathen ni nukhah pen hung kimag ahitai)

KITEPNA NO. 2 - Aphung phunga kiloikhomna jouse hi suhmil a, paokhat tho ho lah akibahnalouna jouse suhtoh loiya chutengleh Pathen sem dungjuiya chikhat/namkhat ihipiteu jouse toh min khat a kivopkhoma kipum khatna lam mano din

kanom uve.

KITEPNA NO. 3 - Leiset kivaipohna lam a natong ten ahithei chan loikhat a aumding u pha kasauve. Ijemtin loi chom-chom a aumkhah tajonguleh nampi dinga khonung thilgon aumteng leh pan khom cheh u kanom uve.

KITEPNA NO. 4 - Gam leh nampi huh na dinga kisalel natong jousen nampi ngailutna jal in tua pat in kichamna, kipumkhatna chu nampi dinga tohkhomna kineitaleh ti kanom uve.

KITEPNA NO. 5 - Hou lam a natong lamkaite jousen Houbung mite khantou theina ding leh Pathen na hattah a toh jouna dingin kibahlouna jouse seitoh a Khrista ngailutna a kikan khom a Houbung khat a kipumkhat a, na hatah a tohkhom tahding kanom uve.

KITEPNA NO. 6 - Gamsung vaichat suhbeina ding leh nampi economy khantouna ding in eima panmun cheh a itohthei chan tong ding in kanom uve.

KITEPNA NO. 7 - Tua pat ahithei chan in nampi Pathen lam a akhantou theina ding in nehguh leh pehguh bolda a itohna cheh a kitah leh tomngaitah a na tohding kanom uve.

KITEPNA NO. 8 - Tua pat a tohding bou toh a tohlou ding tonglou ding le, phatchomna beiya phat moh mansah louding, alamlou/adihlouva misum moh lahpeh leh suhmang bollou ding, Pathen leh society ding a phacom pen dinga phat manding kanom uve.

KITEPNA NO. 9 - Khantouna lama machal theina ding in kho neocha cha a chen sangin kho lentah tah a chending, haosa leh Houbung kilungtoh tah a pankhom ding chuleh economic lam a machal theina ding a akhotin in short term, long term plan haosa ho lamkaina a aneicheh ding hi kanom uve.

KITEPNA NO. 10 - Kachang tum phatchomna ding a kalunggel leh kanatoh hon nampi lunggel leh phatchomna ding dol akal a nampi phatchomna ding asukkhah ding leh keima lunggel leh phatchomna ho chu ipi hijongleh pedoh ing ting nampi deileh phatchomna ding bou pom ing kate.

TAONA DING HO:

Nam sunga kipumkhatna amachal theina dia taoding.

Inam sunguva Politician ho leh sorkal lama lamkai luboh ineihou vin nampi ngailutna neipumma vai ahomtheina diuva taoding.

Nam minpua kiloikhomna chom chom ineihouva dia taoding

Kuki Inpi Manipur
 Kuki Christian Leaders Fellowship
 Kuki Research Forum
 Kuki Women Union
 Kuki Students Organization
 Kuki Human Rights Organization
 Kuki Khanglai Lawmpi
 Kuki Women Human Rights.

Council of Kuki Worship Service,
(Hiche kiloikhomna hohi nampi lhagao leh tahsa a khantou machalna dia manchah pha ahina dia taoding)


Gam le Go ineihou Pathen in eivenbit pihna diuva taoding

Gam le nam huhna dia kisemdoh kiloikhomna chom chom hon
 Pathen gingpuma vai ahomtheina diuva tao ding


Inam pumpiu ikhantou thei na diuva taoding

Pathen ging nam ihi theina diuva taoding

Pathen in iumnau munchah ah eiumpi jing tauhen.



Rev. L.B. Angam
 General Secretary
 Kuki Christian Leaders Fellowship



Rev. Dr. M. Thongkhosei Haokip
 Chairman

KBC Office Superintendant thah



KBC Office a file chetoh thei na ding in phat chomkhat a din natoh eikithopi diuvin Pu Khai-jang Haokip Chassad Avenue Baptist Church in Superintendant mopohna eipohpeh diuvin 1st March 2019 akon in appointment kipeh dungjui in pontho tah in na toh apantai.

Women Column

NUTE NIKHO PROGRAMME

May 12, 2019 (Sunday)

Thupi: Navah u chu miho anga kilang hen

(Mathew 5:16)

Amasan muntin a ngailut umtah Nute ho jouse Kajana le kangailut nao Pakai minin Salam kahinpe cheh uve.

KBC Events Calendar dungjuja ahung lhung ding May 12th, 2019 Sunday nikho hi Nute nikho ahung hitan, muntin a KBC Houbung mithengte jousen hiche nikho hi Nute ho dinga taopeh na nikhoa imancheh diuvin Pakai minin tiemna kahin nei uve. Chule hiche nikho le thupi toh kitoh a sahdingin Laapi jong ahung kisemin, Houbung tin a Nute hon inasah cheh dingvin hetsah na ahung kineije. Programme hung kigong kaval a anopna thei chan a ina kigon uva nom tah a i-man cheh diuvin jong tiemna ahung kineije.. Pathenin ikiloi khomnao KBC phat thei bohjing taken.

MIPI KAIKHOM NA PROGRAMME

*. Houkhom Lamkai	: Women Chairperson
*. Thangvaah na Laa	: Hb, La no.196 (Tuikhanglen panga)
*. Tao ding	: Men Chairman
*. Labung	: BYD / Church Choir
*. Tokhom	: KBC Women Ministry a ding
*. Athenso ding	: Pastor / Head Deacon
*. Bible simding	: Women Secy,
*. Nute taopehna phat	: Pastor/Head Deacon
*. Labung	: Nute 2019 Laapi
*. Thupi	: Pastor/Head Deacon/Guest Speaker
*. Phaina Laa	: Hb, Laa no. 506 (Pakaija dia)
*. Tao mipi achaiding	: Speaker.

Hetsah:

1. *Sun Programme hi detail in ahung kipe tapon, eima eima Houbungin anopna thei le ahoina thei chan a ina kisem diuvin hetsah nahiue.*
2. *Bible chang Kitet na neinom hodingin Col, 3:18-25 hiding.*

TAONA A GELDOH DINGHO:

1. *Tukum 2019 Nute Nikho imuthei jeh uva Pathen thangvahna.*
2. *Nute hinkho lem hon adalhah insung mite hoa dinga taoding.*
3. *Nute tohgon ahung lhung ding October 15 - 18, 2019 sunga hi C/C Salem S.meina G/No.4 a G/no. 4,5,6 kigoma umdinga taoding.*
4. *Children Ministry a dinga Chapang Camp Gambih No. 17 a umding lolhin theina ding.*
5. *Nute Lamkai ho, Houbung, Gambih hoa chule Convention a ho ding..*
6. *Nute vetsuina noija um: Lydia mun'a Student hole Training bol ho chule amopo ho, WW Hostel, Imphal a Student hole amopo ho ding.*

KBC Gambih 14 Nute Lamkai hole Gambih Pastor in Lydia vilna ahung nei



Achesa nisim 4th March, 2019 Monday nikho hin KBC Gambih No. 14 Nute Lamkai hole Gambih Pastor in Lydia vilna ahung neijun, asunga um student hole Training bol ho tilkhouna le taopehna chule ngailut thilpeh in Rs 4000/- jong ahin peuvn, achunguva kipathu Convention Nute jouse le Lydia um ho jouse thalhengin kipa thu sangtah in ahung kiseije. Pathenin Gambih No. 14 mite ho athilpha bolnaova ale tamtah in phat thei boh jing tao hen.

Literature Column

Bible Pumpi Kumkhat (2019) Sunga Thumvei Simchai Masapen Kitetna, Thulhun Thah (New Testament) Pumpi General Knowledge Competitive Exam. 2019, Literary Meet - 2019, chule 2019 Kumlhun Convention Level Sunday School Competitive Exam Thua Hetsana le

Temna

Houbung mite jouse Pakaiya ngailutna Salam ...!

Lekha hung kithot ho amulou houbung ana-um met-mut ji jeh in, thon louva inamu cheh uva, anoiya hetsahna hung kipeho banga inakigot cheh theina diuvin KBC Thuso mangchan avelin hetsahna le temna thuthot ahung kinei kit in ahi.

1. Bible Pumpi Thumvei Simchai Masapen Kitetna

Hichehi akisei banga tukum (2019) sunga thumvei simchai jousen asim patna nikho, phat (nidan), Iha le kum; chule asimchaina nikho, phat (nidan), Iha le kum, Secreatry, Literature & Publication, KBC kom'a phone call/KBC Sunday School Whatsapp group ahiloule tahsa tah a report apah ding ahi.

Akibol hi Pathen thu/ hou thu/ Lhagao thu ahin, jou bol umthei lou ding ahi; ajeh chu jou bol hi chonset ahin, chonsetna chungu thutan ding Pathen aume, ti sumil louva jou bol loudin ikitemuvin ahi.

Kipaman hi hi Rs. 5000/- (Rupees five thousand only) peh ding, Department Budget a panglouva kitilkhouna le kitosot tona a koitobang atoh doh nom hon pan alah thei diu ti ahin, kipa umtah in Pu Seiminthang Misao, Centre Church, Kangpokpi (Chaiman, KBC No 5) in hichea pan ladin kitepna aneito dungjuuiyin sum jong ahin pelut tan achunga Pakai minin kipathu sangtah in iphonguve. Ani channa a ding in Pi Chinneivah Haokip (ADC member Chandel District), Moreh Baptist Church KBC 15 in Rs. 4,000/-, athum channa a din Pu Letkholun Haokip Secretary Centre Church Salem Sapormeina in Rs. 3,000/- ahin petauvin ahi. Ama ho chung ah kipathu sang tah in akiphong e.

Koitobang kipaman hohi lhom sajep a hicheho chungchon hin ken hijat hinsebe nge ti aum jong leh Pakai minin kipah tah in lem ihuive.

2. Thulhun Thah (New Testament) Pumpi General Knowledge Competitive Exam

Hiche hi KBC Events Calendar a kipe kumlhun Convention Level Sunday School Exam nikho le second session a kibol ding ahin, apang nom jous-

en Literature Secretary room a kona Rs. 100/- a Application Form akilah a Apply abol ding, Application Form a Apply bol ho bou pang thei ding ahi.

Hichea kipaman hi Sunday School Exam a to kibang (First Rs. 5000/-, second Rs. 4000/-, third Rs. 3000/- - hiding ahin, certificate khat cheh to hiding ahi.

Hiche jong hi Department Budget a panglouva Pakai min jal a kitilkhouna le kitosot tona a pan lonom ho dia kot hon ding ti ahin, Hiche dungjui hin anoiya kipe hohin pan ahin lataovin ahi. Hito bang a Pathen natoh na le convention ngailut na jalla pan ahin lah nao chung ah kipathu sang tah in akiphong e. Pathen in ajatjan phatthei boh taohen

1. Lhingneithem @ Thethem Manlun Pangjang B/Church KBC 3 1st Prize Rs. 5,000
2. Pi Tingneilam @ Lamcy kipgen Pangjang B/Church KBC 3 2nd Prize Rs. 4,000
3. Pi Esther Haokip w/o Rev. Haoneo Haokip 3rd prize Rs. 3000
4. Pa Thangngam Haokip Kipmunnom B/C KBC 8 Consolation prize (for 4th Positions) Rs. 500/-
5. Kimneihoi Khopijang KBC 21 Consolation prize (for 5th to 10th positions) Rs. 3,000/-

3. KBC Literary Meet - 2019

Literary Meet - 2019 a kitetna ding (Competition Item) ho anoiya hin ahung kitah lange. (Aphat, anikho le amun akisuh toh tengle hung kihet sah ding ahi. Ipi hijongle anoiya kipeho dungjuuiyin ana kiging pan tau hite)

1. Essay Writing: Apang thei dingho - Senior 1, Senior 2 le pilhing class sunga simlai ho.
2. Poetry Writing : Apang thei dingho - Intermediate 1 a pat Senior 2 sunga simlai ho
3. Painting : Apang thei dingho - Junior 1 a pat Intermediate 3 sunga simlai ho

* Essay, Poetry le Painting kitetna Topic ho hi anikho le apet a amun a kipe ding ahi. Hiche kitetna ho hi phat/kum masa a anakibol houbunga kona gambih, gambih a kona khat le ni kilheng doh a hung kisol te hitalouva, chung a kipe (Item hoa apang thei ding kipe class) hoa kon a apang nom chanin KBC Office a Literature & Publication Secretary Room a kon a Rs.100/- (Rupees one hundred only) a Application Form akilah ding, Application Form kilah a Apply bol ho bou pang thei diu ahi. Literature

Secretary kom a Form Submit bolna ding ageipen a (Last date of form submission) - June 30, 2019. Hiche kitetna Item hoa hi kum masa (2018 Lieraty Meet) a First analaho pang thei talou diu ahi.

4. Quiz Competition : Hiche hi kum masa a banga class dungjuia kikhen a Sunday School simmun a kona kidong chu hitalouva, anoiya kipe banga hi kobol ding ahitai.

Group khat bou hiding, Thulhun Thah (New Testament) Bible (Mathew to Revelation) a kona kidong ding ahi.

Apang thei dingho : Senior 1, senior 2 le pilhing class sunga simlai ho Houbung khat a kon a athempen mi 3 gambih level kitetna a pang ding, gambih a kona athempen mi 3 Convention Level kitetna a pang ding.

5. Sunday School Icon : Apang thei dingho - Intermediate 1 a pat Senior 2 sunga simlai ho.

* Houbung khat a kona athempen mi 1 gambih Level kitetna a pang ding, gambih a kon a athempen mi 1 Convention Level kitetna a pang ding. La hi Pathen la hiding, eipao hiding. Hiche kitetna a kum masa a First anala chu pang thei talou ding ahi.

6. Choreography : Apang thei dingho - Junior 1 a pat Senior 2 sunga simlai ho.

* Gambih khat sunga houbungho jouse gambih Level kitetna a pang diu, gambih a athempen group chu Convention Level kitetna a pang ding. Mit vet a vethoilou von a kivon louding chule Pathen hou la tilou a lam louding, La hi Pathen la hiding, eipao hiding.

7. Mi 4 Lasah (Quarted) : Apang thei dingho - Senior 1, 2 le pilhing class sunga simlai ho. La chu Houbung La No. 341 (Jesun eipeuve ahinkho Calvary lhang chungu) hiding ahi.

*Gambih khat sunga houbung jouse gambih Level kitetna a pang diu, gambih a athempen chu convention Level kitetna a pang ding.

8. Extempore Speech : Apang thei dingho - Senior 1, 2 le pilhing class sunga simlai ho.

* Houbung khat a athempen mi 1 gambih level kitetna a pang ding, gambih a athempen mi 1 convention Level kitetna a pang ding.

*. Individual Item ho hi nikho khat a kibol khom ding ahi jeh in, mi khat in Item khat kalval a pan alah thei lou ding ahi.

*Quiz cometition le Choreography tilou item dang jouse hi Final round a pang thei ding top five kilhenna Pre-literary Meet umding, Essay, Poetry

le Painting ho vang hiche nia kichaiding (Final hiding) ahitai. Pre-Literary Meet phat, nikho le mun jong akisuh toh teng hung kihet sah ding ahi.

Chunga kisei ho hi gmbih Pastor, gambih Chairman, gambih Secretary le gambih lamkai dangho, chule houbung lamkaiho, houbung jousea Sunday School Superintendent ho le jilkung hon phatah a Organize in-aboluva, houbung jouse le gambih jousea phatah a inagonuva inabol tei diuvin Pakai minin temna nasatah ahung kineiye.

4. 2019 Kumlhun Convention Level Sunday School Competitive Exam
Anikho : 1st December, 2019 (Sunday)

Apang ding ho : Senior 1 (Bible Pumpi Thumakai)

Senior 2 (Christiante Tahsan Kihilna Baptist Distinctive)

Pilhing (John Henga Thuphondoh)

Examination Centres: 1. Imphal 2. Sapormeina, 3. Churachandpur, 4. Pal-len Molnoi 5. Sugunu, 6. Moreh

**Examination Centre hi akisuh toh tengle ol'a hung kihetsah ding ahi.*

**Kum masa'a banga gambih level a kitetna Exam umtalou ding, Convention Level themvet kitetna a pangnom jousen Literature Secretary kom a Application Form Rs 100/- a akilah a apply abol ding, Application Form kilah a apply bol ho bou pang thei diu ahi. Apply bol hon Application Form a Exam Centre kipeho lah a adeipen pen akilhen a fill up abol ding, hiche mun bouva chu Exam tou ding ahi. Literature Secretary kom a Application Form peh lutna ageipen a (Last date of application form submission) 30th October, 2019. Hiche masanga hi imojouse suh toh ding ahijeh in hiche nunga hi kila talou ding ahi.*

**Ama ama houbunga themvetna nikho le phat hi hiche nikho (01/12/2019) hi to kitosah louding ahi. Hichea kipe class ho tilou anoilang se (Beginner 1 a pat Intermediate 3 chan) hi ama, ama houbungin ama, ama dei dan dan a akibol ding ahi.*

Chunga kisei ho hi gmbih Pastor, gambih lamkai ho le houbung lamkai hon gambih/ houbung miho phatah a inahet them sah cheh diuvin Pakai minin temna ahung kineiye.

Kijah tona thei (Contact) No. 9089593092/ 7005525033

Pakai le mipi lhahcha

Rev. Haoneo Haokip

Secretary,

Literature & Publication, KBC

Salom Theological Column

DEACONS LEADERSHIP TRAINING

Achesa nisim 11-14 March 2019 sung in Gambih 1-7 & 19 sunga KBC Houbung deacon ho dingin training Centre Church Salem Sapormeina muna ana kibol in ahi. Hiche hi achesa 64th General Assembly ana kisei STS noiya deacon ho jouse training peh tei ding ti tohgon na noiya kibol ahi.

Training sunga mopohna eina lahiph u Rev. Ngulkhopao, Church Pastor, Pu Letkholun Haokip, Church Secretary le usher a pang BYD Chairman le aloiho, buhon mehon a panla ho jouse chungu kipathu seijoulou akiseijin ahi. Chuleh, maban ahin CCPur, Pallel le Moreh gamkai ho thuma jong training program kinei kit ding ahijeh in houbung miten taona in geldoh uhite.

Pastors Seminar cum Workshop



Date 7-8 March 2019 sung chun KBC Office Imphal muna KBC Pastor 2012 masanga appoint anahi ho dingin Seminar cum Workshop ana kinei in ahi. Mihil a anapang hochu Dr. Joseph Park (Oxford, UK), le Dr. Jae Sam Lee & Mrs. Esther Lee (USA) ho ana huiuin ahi. KBC Pastor mi 25 vel in nikho sungin resource person hoa kon in kihilna ana nei uvin. Chuleh, tuchunga senior langjep ho akibol nahi ahileh achesa November 2018 sung chun KBC Pastor 2012 jouva appoint hochu Development Associate International tetoh STS muna Workshop ana kinei khom in tua hi June teng 2nd Workshop kineikit ding ahi. Houbung miten Taona in geldoh jing ute.

Rev. Silas Jangminlen Haokip, Co-Ordinator

One Day Office file processing Awareness seminar

Achesa nisim 13 March nichun KBC Office sunga a filing cheding dan kihil na seminar khat anache lhan ahi. Hia chun resource person in



Pu M. Thangpu Haokip le Pu S. Onmang Haokip Superintendent Social welfare anapang hon in ahi. Tunichana office filing chedan kitup lou jeha hahsat nale boina tampi kitoh ho seikhom na akinei jin mabana hitabang boina ho suhlhap a aumtah ding kinap aume. Office staff jousen pan akilan Pathen in mabana office kivaihom kitup nadin asunga natong ho hetna thep na eipe jing taohen.

23rd CHANNA GAMBIH No. 14 TAOKHOM KIPA THUPHON



Achesa nisim 23 March 2019 Saturday nikho in Tuidam Baptist Church mun a Matt. 17:21 Thupi mangchan gambih mi 21 thanom tah in houbung gamsung kile doh kit nadin taona in pan ana kilan Pathen lung set na jallin lolhing in ana kichai theijin Chuleh Khonei houbung miten gambih miho khohsahna neitah a ajen nao chung ah kipathu sang tah in kahin phong e. Pathen in phatthei na ajatjan petau hen.

Mr. Lamkholun Haokip, Mission Secretary, KBC Gambih No. 14

KBC GAMBIH NO. 11 A UM S. GELBUNG VANGKHO A GARI LUT THEI JEH A KIPANA MAICHAM LE LOPNA

Nisim 19, March 2019 in Churachandpur Dist, Sangaikot Block sunga um S. Gelbung, KBC No. 11 kho tol sunga gari alhailut thei jeh in kipana Maicham semna le lopna kingon loupi tah in ana kibol tan ahi.

Rev. Onkho Haokip, KBC Gambih No 11 pastor in lampi thensona le tilkhouna thu aseiyin, Khosung haosa Pu Seiboi Haokip le Lhang-sung a lamkai luboh ho, hou lamkai ho le haosa upahon kin opna le houlimna aneijun, Kin kichai in kipana jal in Houbung in vohchal tuh nga cheh ni athat uvin, kipana ankong aki khomin ahi.



S. Gelbung hi Thengbung mol sang tah vum a um ahin, Akhomun lhun theina ding in Churachandpur akon keng lampi a ahat loi in nidan 4 vel ajot ahi. Sugunu lang akon Govajang apat keng lampi a nidan 3 vel alut in ahi. . Hitia khosung mite gentheina hi kho chen til (1992 kum) apat um ahitan, sarkal lang akon in jong chanvou achan ding uva lom imacha achang jou pouvin ahi.

Hiche lampi kilaina dinga khosung mite (S. Gelbung le T. Kanan mite) in insona in dangka 5,000/-, 10,000/- etc ato khom uva, Twidam Haosapu in jochan akithopiuva chule avat chengse chu inpite in apoh-doh u ahi.

Lampi kilaina JCB le Driver kholsa ijakai hi nidan khat a Rs 2,000/- ahin, lhakhat lhingset asuh/alai ahin sum Rs 6,00,000/- vel lut ahi. Hiche lampi kisuhna ahin nidan 282 alut in nikho 27 alut in ahi.

KBC GAMBIH NO. 11 THUSIM ACHOMLAM'A

Gambih No 11 Executives, Deacons, Secretaries kimelhet na le taokhomna 11 March 2019 nikhohin Centre Church Sangaikot ah akineijin lolhing tah in akichai tai.

KBC Gambih No. 11 amasa a KBC Gambih No. 12 ana kiti ahin Lonpi Area Kuki Baptist Association (LAKBA) gamhop sung'a Gambih khat anahin, Superintendent Pastor Ngamjathang le Pastor Tongkhojam pohna gam sung anahi. 1978 kum Joujangtek Assembly a KBC in Pastorate a kivaihomna ahin kijui apat LAKBA achom'a umdoh a KBC No. 12 anak-isemdoh a H. Makhao Gambih anakiti ahin H. Gamnom kho chu Mission



Centre a ana kimang ahi. 1992-1995 sung'a Manipur thinglhang a cheng Kukite chenna Nagate in ahin delvuh uva kho le veng phabep ana kisuhamang jeh in KBC pumpi in Gambih avel in ahin sempha kit uvin 1995 akon a KBC Gambih No. 12 chu Gambih No. 11 hung kitia chule Gambih Centre jong Sangaikot a hung kichonlut ahi.

Gambih tule tun hin Houbung 18 aum in, Houbung umho chu – T. Leijang, T. Phoilien, G. Khonom, P. Khomunnom, Bongpijang, Moldenphai, Centre Church Sangaikot, Makhao Tampak, MB. Saichang, Lungil, H. Gambnom, Thingbongphai, Zangmun, Twisomjang, Govajang, L. Chaljang, Twidam, S. Gelbung ahiuve. Gambih sunga Centre Church Sangaikot aum in ahi. Houbung umho alenpen in 30 vel ahin aneopen in khat ahi.

Gambih sunga Pastor masapen - Pastor Chungpao Haokip (1979 – 80), Gambih Chairman masapen - Pu Haokhai Hanghal (1978 – 91), Gambih Secretary masapen - Pu Nguljangam (1978 – 80) ahiuve.

Rev, Onkho Haokip, Gambih Pastor

61 KBC Foundation Day

Office mun a Loupi tah a kimang



Achesa nisim 16th March, 2019 (Saturday) chun KBC office mun ah KBC 61st Foundation Day ana kimangin ahi. KBC ponlap khaidohna Pu.Zamkhol Zou, Vice-President in aneiyouvin, Pastor Henkholen Kipgen, Conduct hina in Chapel Hall a mipin kaik-hom na akineijin, phat patna Rev. Thangkhosei Haokip in taona amangin, aumtalou ngailut umtah lamkai masa ho geldohna, adeh a KBC Founderpa Rev.Seikholet Singson in eidalhah nun-guva Foundation Day kamang masapen ahijeh in amajong nasatah in geldoh akineijin, amaho jouse geldoh na Rev. N Baite lamkai nan Jana vetsahna in 1min thipchet in aki um ahi. Pathen vahchoi nala Ng, Nengminnei Haokip a konin akingai Ihan chu in Rev.Dr.Hawlingam Haokip Emeritus General Secretary in KBC dia suhmil theilou thilpha ana bol phabep ho (Diamond Jubilee a ana kibol ban) Rev.Lensei Kipgen, Pu.Jampao Haokip, (L)Rev. Tongkholun Haokip, (L)Captain Haokhosei Haokip chuleh (L) Pu.Vumhem Haokip, amaho cheng in KBC a dinga boilai tah a pan analah dan hou aban neicha a aseitoh Ihonin Saipikhup khat cheh akisil peh uvin ahi. Anikhoa dinga kigong taona items ho Rev. Thangsat Kipgen le NI Hekim Khongsai amanin taona lamkaina anei Ihonin, chujouvin Rev.Tonglet Haokip, President in "Pathenin phatthei eiboh na hou" ti thupi mangchan Pathenin KBC ahin puihoi dan leh tua idinmun u iphah theinau ho aseijin ahi. Pathen puihoi najal in dam le bit keijin program chu Rev. Tongmang Haokip in phatchaina taona amang in lolhing tah in anaki chaijin Pathen thangvah aumin ahi.



KBC Founder pu Rev. Seikholet Singson in eidalhah nung uva Foundation Day kimanna masa pen 16 March nikhon KBC 61 Foundation Day ama ja naleh geldoh na ana kinel In ahl.



13-14 March 2019, Head Decons Training at Centre Church Salem Sapormeina, KBC Gambih No. 4



Post Regd. MNP/81
Regd No. 18134/88



KBC Pastor's Seminar on 7 -8 March 2019 at Chapel Hall

If undelivered, please return to
The Editor, KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173